

Veld Deportivo a keda renoba na Sabana Basora Noord

ORANJESTAD – Demostando un bes mas efectividad y resultadonan concreto cu ta sali for di e programa Bo-Bario, diasabra mainta veld deportivo den Sabana Basora a haya un mehoracion total.

Algun siman atras, e compleho di pariba di brug a haya bishita di Minister di Husticia y tambe Minister di Asuntonan Social y Hubentud. E idea ta pa hunto haci trabou pa mehora e situacionnan menos faborabel cu ta presenta den e comunidad aki. Minister President personalmente a bishita e bario hunto cu departamento di FCCA, Serlimar, Bus di Salud y GKMB pa duna di biaha un asistencia.

Di e manera aki a tuma nota di e necesidadnan cu tin den e area y asina a cuminsa traha riba nan. “Nos a dicidi pa keda enfoca mas riba Sabana Basora. Den e caso aki tabatin diferente desaroyo cu tabata rekeri atencion adicional



y nos a wak cu tin ciudadano cu ta preocupa y cu si nos sostene nan, nan tin un vision di con nan kier desaroya nan bario,” asina Premier Eman a indica.

A cuminsa cu un limpieza grandi rond di e compleho y memey di e casnan caminda esunnan cu mal intencion tabata uza pa haci cosnan scondi.

Sistema di iluminacion publico tabatin mester di reparacion y esey a keda cla tam-

be. Awo, a busca e material y obra di man pa drecha e veld deportivo pa asina ofrece e mucha, hoben y adultonan, un luga caminda nan por haci deporte y recrea sanamente.

Segun Ditto Acosta, e peticion di e habitantenan tabata djis pa pone e postnan pa hunga volley, pero for di banda di BoBario a ripara cu por haci hopi mas cu esey. Esaki ta algo cu ta alegra Parlamentario Desiree de Sousa-Croes, kende tambe tabata presente pa brinda su apoyo



na e accion comunitario. “Akinan nos ta wak un gobierno dunando e bon ehempel. Ora Minister ta drenta den bario bo ta wak e positivismo cu e ta trece cun’e. E por ta musta algo chikito, pero e tin un domino efecto cu ta pasa e energia positivo pa otro,” De Sousa-Croes a enfatisa.

Trabounan pa cu drechamento di e veld ta bay continua den fin di siman cu entrega di palo di golnan nobo pa practica di futbol di sala, instalacion di un backboard nobo pa hunga bas-

ketball, como tambe post pa muchanan por pone un net di volleyball. Ademas, Bo-Bario a percura pa haya heki cu cual ta bay cera rond di e veld, y asina haci esaki mas sigur evitando cu balanan por bay riba caya.

Tipo di accionnan comunitario aki ta bay continua, mescos tabata e caso desde cu Prome Minister Mike Eman a inicia e programa di bishita semanal den bario mas cu cuater aña pasa. Unda cu por duna un man y haci un diferencia, e mandatario ta percura pa yega. □